

Fasnacht 2017

D'Schnurepfluderer Doopesuuger

**S Land duet mit sich ringe,
denn göhn mer halt in d Stadt
go schwinge.**

Zwei Manne stöön im Sägmäälkreis
vo ire Stirne rinnt dr Schweiss
s sin nit dr Trump und nit dr Kim
es sin zwar Böösi, doch nit schlimm.
Si tien an d Schwingerhose griffe
dr Schnuuf got schwer, er duet scho pfiffe,
si stööne und si tien scho groggse,
si trample wie zwei Aueroggse.
Do macht ein dr Wyberhogge,
dr ander het kei Zyt zum Bogge,
gheit uf dr Rugge und isch platt
im Schach wurd's heisse: Bisch schachmatt.
Dä gschpässig Sport - me nennt en Schwinge,
duet all drei Joor e Keenig bringe.
Dr Sterggscht, dr Schlauscht vo allne Senne
macht in dr Regel s ESAF*- Renne
dassch s Eidgenössisch Schwing- und Aelpler-
Fescht und wär dr Schlussgang gwinnt dr Bescht.
Er griegt als Keenig d Loorbeerkrone
me duet ems mit me Muuni lone,
er isch ganz pletzlich ganz vyyl Wärt
uf em Konsum- und Wärbemärt.
Toyota, Emmetaler, Stöcklisch
Bschüssig-Hörnli - renne em si Bude i,
denn si wänn - dangg em stargge Maa -
au e bitz me Batze ha.
Jetz gsesch e Keenig in dr Schwyz
het mit dem Titel au si Krytz.
Niene ka n er mitregiere,
anderi dien en kommandiere,
e Schlungg, e Gamme, e Souplesse
nutzt em nüt gege d Raffinesse
vo sym Hofstaat, är gseet s yy:
Zem Glügg sin drei Joor bald verbyy.
In Estavayer - dort am See -
het me dr letschti Keenig gsee....
und Zyt vergoot grad wie im Flug
dr näggschti Keenig gits in Zug,
im zwanzignüünzää sell das sy
und drei Joor spöter denn am Rhy -
nei an dr Birs - hört me verzelle,
d Aescher hän s ESAF nit welle
so seit d Regierig vo de Rammel,
denn vo Schönebuech bis Ammel
gits niemmer wo ans ESAF glaubt
was isch das ESAF überhaupt,
„mir hei kchei Gäld für sottig Sache,
solle das doch d Städter mache.“

Z Basel het me schnäll d Idee,
me schwingt im Stadion vom FCB.
Dä duet uf s Schutte denn verzichte,
dr Meischerdraum duets nit vernichte
und liige mer falsch mit dr Prognose
so schutte si kinftig in Schwingerhose.
Doch wie griegt me d Bsuecher unter -
E Viertelmillion - seit eine munter,
wenn vierzigtausig ins Stadion göön -
hoppla - das rentiert sich schön,
bruchs - gege zwanzig - oha lätz
grossi Public-Viewing-Blätz,
Feschtzält, Beize, Toitoi-stroosse,
Abfallgugge vo de Grosse,
jedi Mängi Personal,
denn s drum und draa isch kolossal.
Dr Wessels seit: I mach die Planig,
vo Baustelle ha n ych en Aanig
Dr Baschi Dürr goot sälber uf d Pischte,
är het wenig Bolizische,
s Bethli meint: Als Frau Ackermaa
muess ich d Feschtbegriessig ha.
Dr Cramer dänggt, das könntis bringe,
scho im Kindsgi lehrt me Schwinge.
Dr Ängelbärger hört me schimpfe,
bi so vyl Volgg muess i d Basler impfe.
Dr Christoph Brutschin rybt sich d Händ,
i bruch e wyters Kontingänt,
das söll mer bitte Lieschtel stelle,
die hän das ESAF jo nit welle,
s Evi Herzog meint liicht muff,
i hoff mir legge do nit druff
e sone Ufwand fir e Kreenig,
do lob ich mir dr Lällekeenig,
dä loot vo niemerem sich gruuse
und streggt aifach d Zunge use